

1 enformaziuns y termins

Guldanom dai artejans: le comité dai artejans de Mareo lascia alesi che le guldanom por i artejans é en vendres ai 14 de dezember tla dlijia d'Al Plan.

Marcé da Nadé t'La Spona: la Spona, l'Uniun Ladins Val Badia y l'Istitut Ladin envieia al Marcé da Nadé la domegna, ai 2 de dezember, dales 10:00 ales 17:00, con creaziuns artejanales d'La Spona, libri d'Uniun Ladins Val Badia y d'Istitut Ladin Micurá de Rù. Ales 14:00 ciances y melodies d'Advent, ales 14:30 presentaziun de trei libri nös por mituns da pert dai auturs y dedò entratenimont por mituns.

Comun de Mareo: al ven lascé alesi che en **dedolönesc ai 11 de dezember**, ales 20:00, gnarál tigní te Ciasa dles Uniuns l'encuntada con la popolaziun.

Curs de preparaziun al maridé: le Sorvisc ai Jogn Val Badia met a jí i "Dis de preparaziun al maridé" la sabeda ai 27 d'aorí y la domegna ai 28 d'aurí 2019. Le curs ven tigní por ladin con cösc program:

sabeda, ai 27.4.2019: 09:00 - 12:30 dr. Lois Kastlunger (coordinadú)

12:30 - 14:00 marena

14:00 - 17:00 sig. Tone Fiung (ass. spiritual dles families)

17:15 - 19:15 curs da balé (facoltatif)

domegna, ai 28.4.2019: 09:00 - 11:00 dr. Christian Pedevilla (avocat)

11:30 - 12:30 dr. Lois Kastlunger (coordinadú)

12:30 - 14:00 marena

14:00 - 16:00 dr. Lois Kastlunger (coordinadú).

Le curs é limité a 18 pers y por che Osta prenotaziun á valüta, Ves periunse da telefoné te Sorvisc ai Jogn Val Badia, ☎ 0474 523070 cina la jöbia, ai 28 de merz 2019. Cost a per: 160,00 € (curs + 2 iadi marena).

Conzert: en domegna ai 9 de dezember ales 17:00 vegnel tigní te dlijia de Badia n conzert d'Advent "A Betlehem söl iade" con chisc grups co cianta y sona: Cor Kerygma & compagns, Turmbläser de Badia, Ermes Costa da Calfosch, grup de archec.

„Ave, tö es plena de grazia!“

Maria é le dessegn co nes mostra ci che Idio ô nes scinché. I podun lascé valei cösc salüde a Maria ince por nos, sc'i se metun dala pert de Gejú Crist: „Tö es plen/plena de grazia!“ Cösta grazia nes porta y nes ten. Nosta vita, co é baldí maciada dal picé, pó gní varida y salvada. La vijinanza encer Maria nes tol ete ince nos tla grazia de Chelbeldio co nes varesc y nes salva.

Döt le bun a: Rosa Brandlechner ved. Ploner * 02.12.1928
Paul Pedevilla * 02.12.1943
Rosa Vitoria Rubatscher ved. Feichter, Al Plan * 04.12.1933
Maria Maneschg ved. Frontull * 04.12.1934
y a düc chi co á santennom y complesc i agn cöst'edema

Impressum: Ploania d'La Pli; redaziun Franz Rigo y Edith Willeit
Comunicaziuns cina le dedemesaledema sera a Franz Rigo: ☎ 0474 500978 o ✉ ploania@gmx.net
Download plata: www.unitepastorala.org



Plata dla Ploania La Pli de Mareo Santa Maria dal Bun Consei

Ploan: Signor Heinrich Perathoner
E-mail: ploania@gmx.net

Calogna Al Plan: 0474 501006
Radio de Ploania: 93,00 MhZ

UNITÉ PASTORALA



VAL BADIA
www.unitepastorala.org

Ann C

02.12.2018 - Pröma domegna d'Advent

n. 1

Móstresse, Signur, töa tlemenza y scínchesse töa salveza. Alleluia!

📖 **Ier 33, 14–16 | 1 Tess 3, 12 – 4, 2 | Lc 21, 25–28.34–36**

Dal Vangelo do San Lúca:

Te chel tomp á Gejú dit a sü discepu: ²⁵Al apariará segns te soredl, tla löna y tles steres y söla tera sará i popui plens de tema y de spaont por le rausciamont y le drumblamont dal mer. ²⁶La jont se desfantaré dala pora, aspetenn les cosses co ven sora la tera: ciودية les potenzen dal ci gnará scassades decá. ²⁷Spo odaran le Fi dal Om gnenn te na níora con gran potenza y gloria. ²⁸Canche döt cösc met man, spo derzesse sö y alzede le ce; deache osta salveza é dampró. ³⁴Metede averda che enciocades y sboaciades y i fistidi da vignedé ne ves enciurnesci nia y che chel de ne ves tomi nia ados ³⁵desco na tenora; deach'al gnará sora düc i abitanc de döta la tera. ³⁶Stede enmuntri y periede demeztrú, ch'i podeise ti sciampé a döt ci co sozed y ti jí adincuntra al Fi dal Om.

Oraziun dal de

*Periun! Oh Dio, nosc Pere, döt sta te töa potesté: endespra te nos l'orenté de ti jí con de bones opres adancuntra a Crist co é tal gní, por che al nes cherdes a tó ete le post a söa man derta, canch'al gnará tla gloria.
El co é Dio y vir y regneia con te t'unité dal Spirit Sant por düc i secui dai secui. – Amen.*

(Lezionar C)



📖 **Letöres dla Secunda domegna d'Advent:**
Bar 5, 1–9 | Fil 1, 4–6.8–11 | Lc 3, 1–6

Edema liturgica dai 02.12. ai 09.12.2018

DOM 02.	Pröma domegna d'Advent (C) Domegna dla dljia te ciasa Luzius, Bibiana
08:30	Rorate por la Uniun dai Ei, Rorate por la Vijinanza da Curt benedisciun dles gherlandes d'Advent <i>♪ orghi da man</i>
11:30	funziun dal Bato de Isaac Ploner
12:30	funziun dal Bato de Yari Frontull
15:00	a Pliscia s.m. en onú de Sant'André por la Vijinanza da Pliscia
→ 19:00	les ciampanes sona ete l'Advent y envieia al'oraziun te familia
Lön 03.	<i>Franz Xaver, Emma</i> → de d'oraziun te familia
Ded 04.	<i>Barbara, beac Johannes Nepomuck von Tschiderer y Adolph Kolping,</i> → 07:45 Rorate dai scolari <i>♪ scolari</i>
Dem 05.	<i>Anno, Reinhard</i> → 19:30 corona te dljia
Jöb 06.	<i>Mocherá (patron da Curt), Klaus, Nicole - de d'oraziun do vocaziuns</i> 14:00 a Curt, s.m. en onú y rengraziamont de San Mocherá 19:30 Rorate por † Emma Frontull ved. Ellecosta, <i>♪ grup de stromonc</i>
Ven 07.	<i>pröm vendres - Ambrosius, Maria Iosefa, Gerald</i> → signor ploan va a proveder 19:30 Rorate por La Musiga <i>♪ La Musiga</i>
Sab 08.	GRAN FESTA DE SANTA MARIA IMACOLADA De dla Ploania <i>Edith y Elfriede, Sabina</i> 08:30 Rorate por döta la ploania, por i colaoradús y benefaturs dla ploania <i>♪ Wolfram Menschick, Missa alla settecento</i> 14:00 espi da festa y benedisciun eucaristica
DOM 09.	Secunda domegna d'Advent <i>Juan Diego Cuauhtlatoatzin, Valeria, Pierre Fourier, Hanna</i> 08:30 Rorate por i Ministronc y la Schira Jonila <i>♪ scolari</i> <i>oferta por i debojügn dla ploania</i>
<i>ampola:</i>	por † Jep Rovara, Plans
<i>ministronc:</i>	▶ da doman y domegna: Moses Agreiter y Sabine Trebo ▶ da sera y domegna: Fabian Winkler y Alex Pedevilla

<i>i recordun:</i>	Emma Rovara Aichner, Valdaora + 02.12.2015
	Emma Frontull ved. Ellecosta + 05.12.2016
	Jep Ellecosta, La Val + 07.12.2009



Delibré le cör da peisc dessorora (Lc 21, 25–28.34–36)

I ponsi do

I ne podun nia fá finta de nia sce Gejú ven; al é n avnimont co scassa sö la vita y la storia dl'umanità.

Avei le cör lede da cosses co ne va nia debojügn, perié por sontí söa presenza é le miú che an pó fá por n'avei nia tema mo ligreza da podei l'encunté.

I preii ensciö

Co feji pa da perié demeztrú? Y la scora? Le jüch? I amisc y la televijiun? Al é belo trep ch'i sun bun da te dediché val' minut al de. Co poste pa ieré val' de te', caro Gejú? Gnanca patri y mognans de convont ne fej cösc!

Samben, sc'i ponsun empü' do sunse ben püch reconoscionc: tö s'as dé döt y nos se stontun da s'al recordé, da rospogne a to amur y meter deplü averda a te y a töa parora. Tö t'as ben cherí fora de bi amisc. Mo con döt cösc t'öi mefo empó tan bun, Signur Gesú, y i sun propio coriüs da odei desche t'es. Deidemo a m'arjigné ca desch'al alda al'encuntada con te.

☛ **I mo toli dant:** da mo tó vigne de dlaorela por n momont d'oraziun con Gesú.



Vita de ploania y de paisc



“I te cherdi con to ennom” dij le Signur.

Con le Sacramont dal Bato ven tuc sö tla comunité dla Dljia:

Isaac Ploner, de Michael y Giulia (Rara),
Yari Frontull, de Wilhelm y Verena (Janin).

La ploania i fej les miús aodanzas ai geniturs: Idio, la Oma dal Ci y i Sanc Patrons acompagneii Isaac y Yari con söa benedisciun y proteziun.

- **Trei Resc:** dúc i mituns y dötes les mituns dla 1^a y 2^a classe dla scora mesana co jará en n'ater ann a confirmé é der bel enviés da gní en **Santa Maria ai 8 de dezember** do le Guldanom te Ciasa dles Uniuns ala pröma encuntada por meter a jí l'aziun dai Trei Resc 2019.
- **Festa d'Advent:** i mituns y les mitans dal grup dai Ministronc y dla Schira Jonila é enviés en **domegna ai 9 de dezember** do le Guldanom te Ciasa dles Uniuns a na picia festa d'Advent.
- **Grup de oraziun: en dedolönesc ai 4 de dezember** é dötes les porsones co fej pert dal grup de oraziun „**Kettenrosenkranz**“ der bel enviades do le guldanom dai scolari, te calogna, a na encuntada con signor ploan.
- **Joneza:** ince eniann endô organiseia la Joneza na **“Sera dal'Advent”**, con de vigne sort de patüc duc y manco duc da mangé y boandes cialdes. I s'encuntun en **vendres ai 14 de dezember** da sera. dles 18:00 ennant, sön la plaza dlungia le paiun. I sperun da s'odei en trec!
- **KVW:** le KVW envieia dúc canc en **domegna ai 16 de dezember**, do le Rorate a na picia **festa d'Advent** te Ciasa dles Uniuns.